

## ORDENANZA NÚM. 35

### REGULAMENTO DO REXISTRO MUNICIPAL DE UNIÓNS DE FEITO E DA SÚA FISCALIDADE

#### CAPÍTULO I. DISPOSICIÓNS XERAIS

##### Artigo 1. OBXECTO E RÉXIME XURÍDICO.

Constitúese no Concello de Vilalba o **Rexistro Municipal de Unións de Feito** que terá carácter administrativo e se rexerá polo que se dispón no presente regulamento, incluídos os seus anexos e demais disposicións que se poidan ditar para o seu desenvolvemento.

##### Artigo 2. ÁMBITO

No **Rexistro Municipal de Unións de Feito** poderán inscribirse todas aquelas parellas, que polo seu libre e pleno consentimento constitúan unha unión de convivencia non matrimonial, pero con análoga relación de afectividade, con independencia da súa orientación sexual, manifesten a súa vontade de inscribila no rexistro e cuxos membros teñan a súa residencia habitual e figuren empadroados no Concello de Vilalba, se ben, no momento da inscrición é suficiente con que un deles figure empadroado no Concello de Vilalba e, unha vez inscritos no **Rexistro de Unións e Feito**, quedarán obrigados a inscribirse, ambos os dous membros, no Padrón Municipal de Habitantes.

##### Artigo 3. REQUISITOS DAS INSCRICIÓNS.

3.1. Serán requisitos para levar a cabo a inscrición:

- a) Ser maior de idade ou menor emancipado e non ter sido declarado incapacitado por resolución xudicial.
- b) Non estar ligado por vínculo matrimonial subsistente.
- c) Non estar inscrito como membro doutra unión non matrimonial non cancelada.
- d) Ter a súa residencia habitual e figurar empadroado no Concello de Vilalba ou, en todo caso, reunir este requisito un deles, inicialmente, tal e como se expresa no **artigo 2**.
- e) Non ter relación de parentesco por consanguinidade ou adopción en liña recta.
- f) Non ter relación de parentesco colateral por consanguinidade ou adopción ata o terceiro grao.

g) Non figurar inscrito en ningún outro rexistro municipal de parellas de feito.

3.2. A inscrición realizarase despois da sinatura da correspondente solicitude, segundo o modelo do **anexo I deste o regulamento**, por ambos os dous membros da unión mediante comparecencia persoal e conxunta diante do funcionario encargado do rexistro, e na que se efectuará a correspondente declaración responsable dos seguintes extremos:

- a) Existencia da unión de convivencia non matrimonial con indicación do domicilio de empadramento desta.
- b) Inexistencia de vínculo matrimonial.
- c) Inexistencia de inscrición no que conste como membro doutra unión non matrimonial non cancelada.
- d) Inexistencia de declaración de incapacitación por resolución xudicial.
- e) Inexistencia de relación de parentesco por consanguinidade ou adaptación en liña recta.
- f) Inexistencia de relación de parentesco colateral por consanguinidade ou adopción de ata o terceiro grao.
- g) Non figurar inscrito en ningún outro rexistro municipal de parellas de feito.

3.3. Á solicitude de inscrición acompañarase a documentación acreditativa do cumprimento dos seguintes requisitos:

- a) Maioría de idade ou acreditación de emancipación, segundo o establecido no **artigo 314 e seguintes do Código Civil**.
- b) No seu caso, declaración xudicial de divorcio ou nulidade.
- c) No seu caso, documentación xustificativa de viuvez.
- d) Xustificante de empadramento dos membros da unión non matrimonial (**incorporarase de oficio**).

3.4. Unicamente se poderá efectuar a instancia de un só dos membros da unión a inscrición da extinción desta por vontade unilateral, previa audiencia do outro membro e segundo o que se dispón no **artigo 6.2.b) do presente regulamento**.

#### **Artigo 4. DECLARACIÓNS E ACTOS INSCRIBIBLES.**

Serán obxecto de inscrición:

- a) A declaración de constitución das unións de feito (realizada segundo o modelo do **anexo I**) e a extinción destas cando concorra algunha das causas do **artigo 6**.
- b) Os contratos civís reguladores das relacións persoais e patrimoniais así como outros feitos e circunstancias relevantes que afecten á unión extramatrimonial.

## **Artigo 5. EFECTOS.**

A inscrición no rexistro de parellas de feito terá efectos meramente declarativos sobre a constitución, e extinción das unións de feito, así como dos contratos reguladores das relacións persoais e patrimoniais.

## **Artigo 6. DA CONSTITUCIÓN E EXTINCIÓN.**

6.1. Para os efectos establecidos no presente regulamento, a data de constitución será a da súa manifestación e inscrición.

6.2. Serán causas xustificadas da extinción das unións e cancelación da inscrición as seguintes:

- a) Mutuo acordo.
- b) Vontade unilateral de un dos membros da parella con notificación fehaciente ao outro.
- c) A morte ou declaración de falecemento dalgún dos seus membros.
- d) Separación de feito de máis de 1 ano.
- e) Matrimonio dalgún dos membros.

## **Artigo 7. LIBRO REXISTRO.**

O rexistro materializarase nun libro-rexistro municipal de unións non matrimoniais que estará formado por follas numeradas e seladas, legalizado coa sinatura do secretario municipal, incluíndose nos asentos os seguintes extremos:

- a) Datos identificativos dos membros integrantes da unión.
- b) Domicilio da convivencia.
- c) Data de constitución da convivencia.
- d) A transcrición en extracto dos contratos civís reguladores das relacións persoais e patrimoniais das parellas de feito.
- e) Calquera modificación posterior dos datos inscritos.
- f) Data e causas da extinción.
- g) Outros feitos ou circunstancias relevantes que afecten á unión non matrimonial.

## **Artigo 8. PUBLICIDADE.**

O libro-rexistro municipal de parellas de feito non ten carácter público. Coa finalidade de garantir a intimidade persoal e familiar dos/as inscritos/as como membros de parellas de feito a publicidade do rexistro quedará limitada, exclusivamente, a expedir certificacións dos rexistros que serán expedidas a instancia de calquera dos membros da unión ou dos xuíces ou tribunais de xustiza.

## **Artigo 9. ÓRGANO COMPETENTE.**

O alcalde-presidente será o órgano competente para resolver sobre calquera tipo de inscrición que se pretenda efectuar no rexistro así como para a regulación do acceso, rectificación e cancelación dos datos cando proceda.

As resolucións que se ditén relativas á inscrición, modificacións ou extinción, así como as de inscricións de actos complementarios, adoptaranse no prazo máximo de 1 mes, unha vez transcurrido este sen que se tivese ditado entenderase desestimada por silencio administrativo.

#### **Artigo 10.**

No eido competencial desde Concello, todas as unións non matrimoniais de convivencia inscritas no **Rexistro Municipal de Unións de Feito**, terán a mesma consideración administrativa que as unións matrimoniais, sen obstáculo doutras formas de proba.

Así mesmo, e para os efectos administrativos, e dentro do eido competencial deste Concello, recoñecerase a antigüidade das unións de feito inscritas noutros rexistros municipais, circunstancia que deberán acreditar.

### **CAPÍTULO II. ASPECTOS FISCAIS DA ORDENANZA**

#### **Artigo 11. - Obxecto**

En uso das facultades concedidas polos **artigos 133.2 e 142 da Constitución e o artigo 106 da Lei 7/1985, do 2 de abril, reguladora das bases do réxime local**, e de conformidade co que se dispón nos **artigos do 15 ao 19** en relación co **artigo 20 do Real decreto lexislativo 2/2004, do 5 de marzo**, establécese a taxa por prestación de servizos de inscrición, modificación e cancelacións de unións de feito no rexistro municipal.

#### **Artigo 12. - Feito Impoñible**

Constitúe o feito impoñible da taxa a actividade municipal conducente aos tramites relativos á inscrición, modificación e cancelación no rexistro municipal de parellas de feito.

#### **Artigo 13. - Suxeito Pasivo**

1. Son suxeitos pasivos da taxa as persoas físicas que soliciten a inscrición, modificación e cancelación de inscricións no rexistro municipal de parellas de feito.

#### **Artigo 14. Taxas**

a) Tramites de constitución, extinción e modificación: 300,00€

## **Artigo 15. - Ingreso da taxa**

1. O ingreso da taxa efectuarase nas oficinas de recadación municipal mediante a incorporación da carta de pago ou escrito de solicitude de calquera acto aos que se refire o feito impositivo, e con carácter previo ao acto que o motiva.

2. Os escritos recibidos polos condutos a que fai referencia o **artigo 38 da Lei 30/1992, do 26 de novembro**, pola que se regula o **régime xurídico das administracións públicas e do procedemento administrativo común** que non veñan debidamente reintegrados, serán admitidos provisionalmente, pero non poderá dárselles curso sen que se subsane a deficiencia. Para esta finalidade requirirase ao interesado para que, no prazo de 10 días aboe as cotas correspondentes co apercibimento de que, unha vez transcorrido o dito prazo sen efectualo, se teran os escritos por non presentados e será arquivada a solicitude.

## **Artigo 16. - Infraccións e sancións**

En todo o relativo á cualificación de infraccións tributarias, así como das sancións que a estas corresponden en cada caso, estarase ao que se dispón nos **artigos 178 e seguintes da Lei xeral tributaria**.

## **Disposición Derradeira.**

A presente modificación de ordenanza, aprobada polo **Concello Pleno na súa sesión celebrada o 27/07/2012**, entrará en vigor a partir do día seguinte á publicación do seu texto íntegro no Boletín Oficial da Provincia (9/10/2012), permanecendo en vigor ata a súa modificación ou derogación expresa.

## ANEXO I

### SOLICITUDE DE INSCRICIÓN DE UNIÓNS DE FEITO.

Don/dona. \_\_\_\_\_, con DNI núm. \_\_\_\_\_  
e Don/dona. \_\_\_\_\_, con DNI núm. \_\_\_\_\_  
\_\_\_\_\_maiores de idade, veciños de,  
\_\_\_\_\_con domicilio en \_\_\_\_\_

#### EXPOÑEN:

Que desexan realizar a inscrición no Rexistro de Unións de Feito do Concello de Vilalba, e para iso

#### DECLARAN:

1º. Existen unha unión de convivencia non matrimonial estando empadroados nos domicilios seguintes-----  
-----

2º. Non existe vínculo matrimonial.

3º. Non existe ningunha inscrición no que conste como membro doutra unión non matrimonial non cancelada.

4º. Non existe declaración de incapacitación por resolución xudicial.

5º. Non existe relación de parentesco por consanguinidade ou adopción en liña recta.

6º. Non figurar inscrito/a noutro **Rexistro Municipal de Unións de Feito.**

7º. Non existe relación de parentesco colateral por consanguinidade ou adopción ata o terceiro grao.

Por todo o exposto,

#### SOLICITAN:

A inscrición no **Rexistro Municipal de Unións de Feito.**

Vilalba, \_\_\_\_ de \_\_\_\_\_ 200\_\_

**Sr. ALCALDE PRESIDENTE do Excmo. Concello de Vilalba**

## ANEXO II

### SOLICITUDE DE BAIXA NA INSCRICIÓN DE UNIÓN DE FEITO (Esta solicitude poderá ser suscrita por un ou polos dous membros da parella)

Don/dona. \_\_\_\_\_, con DNI núm.  
\_\_\_\_\_ e Don/dona. \_\_\_\_\_, con  
DNI núm. \_\_\_\_\_ maiores de idade, veciños de,  
\_\_\_\_\_ con domicilio en \_\_\_\_\_.

#### **EXPOÑEN:**

Que están inscritos no Rexistro de Unións de Feito do Concello de Vilalba e,

**SOLICITA**, que despois dos trámites regulamentarios se proceda á inscrición da baixa de unión de feito no dito rexistro.

Vilalba, \_\_\_ de \_\_\_\_\_ 200\_

**Sr. ALCALDE PRESIDENTE do Excmo. Concello de Vilalba**

